

SA nie reg vir Spele se vlam

Moet Suid-Afrika weer probeer om die Olimpiese Spele aan te bied? Nie nou nie en nie gou nie, skryf **Pieter Cronjé**.

Die prestasies en medalje-oes van Suid-Afrika se Olimpiese span in Londen laat ons, tereg, trots voel.

In die euforie van dié sukses wonder baie sportliefhebbers of Suid-Afrika nie wêér moet probeer om dié reuse-sportspel self aan te bied nie.

Die Wêreldbeker-sokkertoernooi van 2010 was immers 'n reuse-sukses en Kaapstad was ongelukkig met sy vorige bod om gasheer te wees vir die 2004-Spele.

Daar is egter 'n groot verskil tussen kyk en geniet en om die Spele self aan te bied. Daar is ook 'n groot verskil tussen die aanbied van die Wêreldbeker-sokkertoernooi en die Olimpiese Spele.

Die hele land het WB2010 aangebied en die gasheerstede het elk hul deel gedoen - met infrastruktuur, dienste vir besoekers en logistiek. Met so 'n nasionale poging is dit makliker vir die sentrale regering om ruim by te dra.

Die Olimpiese Spele word deur 'n enkele stad aangebied. Een stad is verantwoordelik vir die atletiekstadion, die fietsrybaan, die boog-, pistool- en gewerskietbane, die swembaddens en duikplanke, die gimnastieksale, die arenas vir perdesport, water vir roei en die tientalle ander sportsoorte wat elkeen die hoogste vereistes stel.

Daardie stad moet genoeg blyplek, huurmotors, vrywilligers, tolke, nooddienste en gesondheidsorg voorsien vir 'n inval van derduisende sportlui, binelandse en buitelandse besoekers en beamptes.

Alles, van sanitasie en kragvoorsiening tot vullisverwydering en wetstoepassing, moet soos 'n Olimpiese horlosie werk.

Die enkele belangrikste vereiste is egter 'n gesofistikeerde, uiters betroubare, gerieflike, eenvoudige verstaanbare en flink vervoerstelsel. Hoe verder die sportstadions versprei lê, hoe meer kri-

तिक раак die vervoerstelsel.

Geen voornemende gasheerstad het alles wat die Internasionale Olimpiese Komitee (IOK) vereis nie. Enorme bykomende beleggings in infrastruktuur, verbeterings en operasionele vermoë is nodig.

Dis tegelyk 'n enorme militêre operasie en 'n belegging in 'n mega-onderneming wat 'n gasheerstad vir twee tot drie dekades gaan bind. Dis 'n proses wat reeds jare vóór die Spele met die bodproses begin en jare daarna steeds voortduur deur die instandhouding van die stadions en ander infrastruktuur en die oes van die bemarkings- en toerismegeleenthede wat uit die Spele voortvloei.


Tensy die nasionale regering dus die aanbied van die Spele as 'n nasionale prioriteit beskou en bereid is om reuse-bedrae in 'n enkele stad te belê, kan een stad nie die kapitaal en risiko bekostig nie.

Om groot lenings te diens as die Spele eers verby is, veral as die verwagte inkomste nie gerealiseer het nie en die kostes hand uitgeruk het, is 'n nagmerrie. Die geskiedenis van die Olimpiese Spele bied talle gevallestudies van suksesse én mislukkings.

Waarom pak stede dan hoegenaamd so 'n duur, riskante en moeilike projek aan?

'n Belangrike rede is om die Spele 'n katalisator en instrument te maak om jou stad se ontwikkelingsdoelwitte te verwesenlik - in terme van infrastruktuur, verbeterings, sosiale en ekonomiese ontwikkeling, beter ruimtelike beplanning, geriewe en dienste.

Barcelona en Beijing is goeie voorbeelde. Hulle het presies geweet waarheen hulle op pad is en hoe die Spele hulpbronne, energie, beplanning, politieke en bestuurswil en geldelike bronne kan belyn (amper soos die planeet!)



Moet 'n Suid-Afrikaanse stad weer probeer om dié sportskouspel aan te bied? Dit sal nie 'n goeie idee wees nie, reken die skrywer. | FOTO: REUTERS/KAI PFAFFENBACH



Ons moet ons toespits op nasionale en internasionale byeenkomste wat bestaande geriewe kan benut.

om dit in aksie en tasbare resultate om te skakel.

Die nalatenskap van die Spele is die werklike toets van sukses. Die voorafbelangstelling en opwinding van die voorbereiding, die gebeurtenis self, die miljare televisiekykers en die miljoene besoekers gaan verby. Ná die tyd kom die ouditeure, kritici en ontleders om die werklike sukses, gemeet aan volhoubare ontwikkeling, werkskepping, beleggings, groei, kostes en voordele te meet.

Die Spele is ook 'n ongelooflike bemarkings- en publiseitsgeleentheid -

van die begin van die bodproses, tydens en jare ná die aanbied van die geleentheid. Daar is wêreldwye nuuskierigheid en mediabelangstelling. Dit is hoe-om jare jare jare, kundige, ingeligte en beskikbare inligtingsbronne en mediawoordvoerders in die geleedere van die organiseerders en al die rolspelers nodig het.

Al die kwelvrae oor kostes, tydskale, vervoer, veiligheid en logistieke reëlins sal kom. Jy is óf gereed, bekwaam en altyd beskikbaar om dit te beantwoord óf swak publisiteit is jou voorland.

As die wêreld se televisiekameras op jou gerig is, is dit 'n wonderlike geleentheid om jou beste voet voor te sit. Jy is ook baie kwesbaar - dit kos net een terreuraanval of voorval waarin toeskouers beseer of dood is en dit bly die etiket van daardie Spele.

Sokker bly kykers se gunsteling-sport. As jy al die televisiekyk-geleentheid in die wêreld bymeekaartel (een kyker se talle kere), was die kumulatiewe kykertal vir die Spele in Beijing 6 miljard mense. Vir WB2010 was dit 26 miljard!

Moet Suid-Afrika dus die Olimpiese Spele aanbied? Na my mening nie nou nie en nie gou nie.

Ons moet ons eerder toespits op nasionale en internasionale byeenkomste wat bestaande geriewe kan benut met min of geen aanpassing, wat minder riskant en duur is en 'n goeie opbrengs op belegging, werk en doelwitte bied.

Beplan jou stad en land se sosio-ekonomiese doelwitte deeglik en vind die byeenkomste wat inpas by jou stad en land se unieke eienskappe (Kaapstad het berge, oseane en natuurskoon wat goed werk vir buitelusport soos padwedlope, seiljagvaart, swem en fietsry).

Gebruik jou ervaring, suksesse, lesse en mislukkings as boublokke vir groter dinge. Skerp jou operasionele vernuf in ingenieurswese, beplanning, logistiek, projek- en risikobestuur op, maak baie (en konserwatief) seker van jou finansiële sake- en finansieringsmodel en beplan veral deeglik vir die nalatenskap. Dis die ware toets.

Pieter Cronjé was die Stad Kaapstad se kommunikasiedirekteur en -woordvoerder en was vyf jaar lank by die Wêreldbeker-sokkertoernooi van 2010 betrokke. Hy is tans 'n onafhanklike konsultant wat Brasilië en Mordowië ('n republiek binne die Russiese Federasie) adviseer oor die Wêreldbeker-sokkertoernooie van 2014 en 2018.